

Litaba leqephe la 5

**Tšireletso
ke ntho ea
bohlokoa**



**Marang-rang
a ntlafatsa
thuto**

7



Litaba leqephe la 8

**Litlholisano
li'a
thakhoha**

A lokisetse Morena Sechaba se phethehileng (Luka 1,17)



MOELETSI oa BASOTHO

SELEMO SA 92-4517

www.moeletsoabasotho.co.ls

5-12 Pherekhong 2024




3

LIPALO LI HLOA MEKOALABA

www.moeletsoabasotho.co.ls

Moeletsi oa Basotho



Re se re fumaneha ho marangrang

Email: newsroom@moeletsoabasotho.co.ls
Tel: +266 28350466/ Whats app: 62600983

P.O Box 18, Mazenod 160

Tel: +266 28350466/62600983 WhatsApp
Email: newsroom@moeletsoabasotho.co.ls



MOELETSI

Ho nahana ha se ho tseba

Mofetše o balelloa har'a mafu a mang a kotsi haholo a nkang bophelo ba batho ka sekhahla hobane ke lefu le hlokoang pheko haeba le ka liehoa ho alafashoa. Leha ho le joalo ho na le lefu mona le kotsi ho feta le ona mofetše ono e leng la kelello. Ho na le maqhekoana a seng a ile a bolaoa a mangata ao le a tsebang ho thoe ke baloi ka lebaka la lefu la kelello. Metseng le metsaneng leo le phelang ho eona ho tletse batho ba tšoeroeng ke lefu lena. Joale mapatlelong a teropo ea Maseru ba bangata haholo, 'me hangata ntho ena e bakoa ke khatello ea maikutlo e ka tlišoang ke bofuma kapa qholotso e 'ngoe feela bophelong joaloka ho se ikamohele.

Taba ena e ba bohloko haholo ha e bonahala bathong bao u ka reng ba phetse hantle, ba bile ba kene sekolo ho ka tseba phapano lipakeng tsa lintho tse ling. Ruri u ka tia u hlpanya kamor'a boithuto bo itseng hore ho ea sekolong ha se ho ruteha. Motho a ka se kena sekolo a tšoara mangolo a mangata a matelele empa a sa ruteha ho hang. Ebe bohloko haholo ha eena a nahana hore o rutehile a ka le ruta tsohle lefatšeng mona joalokaha eka li thehiloe ke eena. Ho nahana hore u tseba tsohle ho ho thibela ho ithuta hobane ha u etse liphoso ebile u sitoa le ho bona ntho e kapel'a mahlo a hao hoo hoja ke noha e ka u lomang.

Ke ntho e tsebahalang hore kaofela re amohela litaba ho latela hore na re se ntse re e-na le eng ka bookong ba rona, empa hoo ha ho sitise hore motho a ka lula fatše a inahana ka taba. Joale motho o tla phahamisa maikutlo a thakhise ba bang a phatlalatsa litaba tseo e seng 'nete hobane feela a li balile le ho li amohela ho latela kelello ea hao. Ebe ke lefu la mofuta ofe leo motho a ka sitoaang ho bona ntho e ngotsoeng empa a e balile? A ipalle lipakeng tsa mela ebe o tšatsa lerata la hore ho na le phoso moo empa e le eena bothata.

Tokomane e ileng ea ntšoa ke Lefapha le ikarabellang Litabeng tsa Tumelo Motse-Moholo Vatican e ileng ea ba ea tekeneloa ke Ntate ea Halalelang, e ile ea baka moferefere o tšabehang lefatše, ngoahola matsatsi pele ho liphomolo tsa Keresemese. Marata le moferefere oo ho ile ha tsebahala hore li tla ba teng eaba ho lekoka ka litsela tsohle ho hlaola le ho baleha tseo tsohle ka ho etsa tlhaloso e telele. Leha ho le joalo batho ba ile ba ikhethela ho ipalla le ho phathalatsa se ratoang ke maikutlo a bona.

Le rona re le Koranta re ile ra leka hore re mpe re ngole taba eo ka leleme la lapeng e le hore Basotho ba tsebe ho utloisisa le ho ithuta litaba tseo e le hore ba fahlolle ba fahluoeng, ka bomalimabe ba ile ba iphetola lifofu tse tataisang tse ling. Kamohelo ea litaba tsena e ile ea ba e soabisang, haholo ha e etsoa ke bana babo Kereke ena e Katholike. Ha ba tloha feela ba ipalla lipakeng tsa mela, kamor'a moo ba tšasa lerata. Ba se ntse ba ipalletse lipakeng tsa mela joalo ha ba ikhathatse ho bala litaba tse kahara koranta kaha hoo e ne e le sehlooho sa litaba. Bang ba ikarabella ka hore litaba tse kahare ha li bohlokoa hakaalo hobane sehlooho ka bosona se khelosa batho. Sona sehlooho seo se hlakile hobane ho qotsuoe mantsoe ao e seng a 'nete a ntseng a matha marang-rang mona.

Hoa hlaka hore ho ne ho e-na le litebello tse itseng ho tsoa sechabeng sa balumeli mabapi le litaba tsena. Koranta e ne e lebeletsoe ho fana le ho ngola ka tsela e se ntse e khethiloe ke bahlomphehi, joale ha e sebelisa e 'ngoe e hlaha e fositse. Ana Morena Molimo le hoja a re bopile ka tšoano le eena likello esita le litšobotsi tsa rona ha li'a fapakana na? Re na le libopeho tse sa tšoaneng, eare le ona mafahla a nang le litšobotsi tse tšoanang ba ntse ba sa nahane ka mokhoa o le mong. Joale ekaba rona re ne re tsekisoa'ng ha re beha litaba ka maikutlo a rona? Re ne re tsebella kae se ka likelellong tsa batho ba bang? Re se re behiloe molato ka lebaka la batho ba fetileng le sekolong ba sa ithuta ka botlalo. Ntho e 'ngoe feela e re qabantseng le babali ba rona le matšoa ana "..."

Contacts: +266 28350 466 / 6260 0983 (Whats app)
Email: moeletsioabasotho@gmail.com

MOELETSI oa BASOTHO
A LOKISETSE MORENA SECHABA SE PHETHELENG (LUKE 1:17)

Editorial

Lesoetsa Rakubutu (Editor)
(+266) 58490670 / 62031949
editor@moeletsioabasotho.co.ls

Lehlohonolo Mohale (Sub-editor)
(+266) 58 771 507 / 62 771 507
subeditor@moeletsioabasotho.co.ls

Advertising

Thabo Lesaona
(+266) 28 350 466/ sales@moeletsioabasotho.co.ls

Newsroom

Nthabeleng Seitlheko 57 665 038/ 68 216 721
nthabeleng.seitlako@moeletsioabasotho.co.ls

Tšelis Thakholi (Sports) 58 540 853/ 63 480 404

newsroom@moeletsioabasotho.co.ls

Production Desk

'Mateele Liqa, Sr Canicia Nthunya

Tšepahallang Basotho-Rabasotho

Nthabeleng Seitlheko

Motlotlehi Letsie III o ipilelitse ho 'muso le ho baetapele bohle ba sechaba ho tšepahalla Basotho ka ho ntšetsapele mosebetsi oa tlhopho-bocha, kaha bohle ba lakatsa ho phela naheng e nang le botsitso, khotso le moruo o ntlafetseng. O

Rabasotho o itse tšepo ea sechaba sa Basotho ke hore phethatso ea tlhopho-bocha e tla ba fihlisa ho Lesotho leo ba le batlang. Ho feta mona, o boetse a ipiletsa ho Basotho ho amohela phethoho ea boemo ba leholimo, kaha ba se ba tlii'o phela le eona. A re lihlooho tsa linaha, mebuso le mekhatlo e meholo ea lefatše li ile tsa kopana 'mokeng o moholo oa lefatše, United Arab Emirates, moo ba neng ba kopane ho thakelana ka maikutlo le ho fana ka malebela, ka sepheo sa ho fumana

o khotaletsa Basotho ho ikakhela ka setsoana temong.

O bontšitse hore selemo sena sa 2024 se tlii'o etsa nalane kahar'a Naha ea Lesotho, kaha se tšoaea lilemo tse 200, sechaba sa Basotho se thehiloe ke Morena Moshoeshe I. "Le tla hopola Basotho ba khabane hore ka khoeli ea Mphalane 2023, re ile ra keteka letsatsi la boipuso ka ho thakhola leeto la ho keteka lilemo tse 200, tsa ho thehoa ha sechaba sa Basotho ke Mothehi oa sona Morena Moshoeshe I." A ri-



Motlotlehi Letsie III.

buile tsena molaetseng oa hae oa litakaletso tsa mahlohonolo a selemo se secha ho sechaba sa Basotho ka la 31 Tšitoe ngoahola.

mekhoa ea ho theola sekhahla sa litlamorao tsa phetoho ea leholimo.

A re Naha ea Lesotho le linaha tse ling tse holang, li ile tsa ipiletsa ka matla ho linaha tse khohlo, ho tšepahala litšepisong tseo ba li etsang tsa ho thusa linaha tse holang, tlokotsing ena ea phetoho ea leholimo. A re leha ba se ba elelletsoe hore maemo ana a tliša komello, lipula tse tsamaeang le likhohola, lifefo le mochoso o phahameng,

alo.

Motlotlehi a qetella ka hore, "e ntse e le tšepo ea ka hore Basotho bohle, ba tla kena leetong lena la ho keteka lilemo tse 200 ka thabo. E bile ba keteka ka litsela tse tla matlafatsa moea oa lerato, bonngoe le kopano ea sechaba. Re lokela ho keteka ka sebopeliso sena hobane sechaba sa Basotho se thehiloe holima metheo, ea khotso, lerato, kopano le bonngoe." Ke Rabasotho eo.

Lipalo li hloa mekoalaba

Nthabeleng Seithheko

Chief Officer Bokang Ramotena, o re lipalo tsa batšoaruoa li hloele mekoalaba hoo le mokhoa oa ho robala e leng bothata 'me hona ho beha le bophelo ba batšoaruoa tsietsing hobane mafu a ka fetisetsanoa ha bonolo. O boletse tse-na puisanong le koranta, ka la 4 Pherekhong monongoa.

A supa ha litlaleho tsa batšoaruoa ba amohetsoeng Litsing tsa Tlhabollo ea Batšoaruoa naha ka bophara ho tloha ka la 27 ho isa la 29 Tšitoe 2023, e le batšoaruoa ba 95, ba emetseng linyeoe ba 85, ba ahlotsoeng ba 10, mosali a le mong le banna ba 9.

O re liqoso le likahlolo tsa bona li suptjoa e le tse latelang, bosholu bo atileng banna ba babeli, oa pele o ahlotsoe likhoeli tse tšeleng

kapa ho itefella M600.00, oa bobeli o ahlotsoe lilemo tse peli kapa ho itefella M2,000.00. Ho sitisa phethahatso ea toka ka Lefapha la Sepolesa ke banna ba babeli, ba ahlotsoe ho hlo-la Litsing tsa Tlhabollo ea Batšoaruoa nako ea lilemo tse peli kapa ho itefella M2,000.00 motho ka mong.

Ho ruoa sethunya le mahlaahlela ka thoko ho molao ke monna a le mong ea ahlotsoeng lilemo tse tharo kapa ho itefella M3,000.00, ho khakhatha, monna a le mong ea ahlotsoeng lilemo tse tharo kapa ho itefella M3,000.00, ho fumanoa ka bokhothokhotho ba chelete ea lefofo, monna a le mong ea ahlotsoeng lilemo tse tšeletseng kapa ho itefella M6,000.00.

Ho qheketsa malapeng mosali a le mong ea ahlotsoeng lilemo tse tšeletseng kapa ho itefella M6,000.00, bomenemene ba chelete ke monna a le mong ea ahlotsoeng lilemo tse tšeletseng kapa ho itefella M12,

000.00. Ho apola likobo ka sheshe ke monna a le mong o ahlotsoe lilemo tse 10.

Bats'oaruoa ba emetseng linyeoe ba le Litsing tsa Tlhabollo ea Batšoaruoa ba 85, basali ba babeli le ban-

na ba 83.

Liqoso tsa bona, lipolao ke banna ba 52, ho apola likobo ka sheshe banna ba supileng, bosholu ba boqho-bane banna ba tšeletseng, ho qheketsa malapeng

banna ba bahlano, bosholu bo atileng banna ba bane, teko ea polao ke banna ba bararo, ho khakhatha banna ba babeli, ho ruoa sethunya ka thoko ho molao banna ba babeli, monna a le mong ke ea thobileng litsing tsa sepolesa, ho fana ka bopaki ba leshano ke mosali a le mong, ho tlola molao oa tšireletso ke mosali a le mong le tšenyoe ea thepa ke monna a le mong.

Batšoaruoa ba lokolotsoeng Litsing tsa Tlhabollo ea Batšoaruoa naha ka bophara ba 30, ba itefeletseng 'bail' ke banna ba 21, ba lokolotsoeng ho ea ikalosa, banna ba bahlano, ba qetileng likahlolo tsa bona banna ba bararo ea lokolotsoeng hoba nyeoe eo a neng a qosoa ka eona e hutsoe ke monna a le mong.

Ramotena o bile a netefatsa hore bekeng eo, ha ho motšoaruoa ea thobileng Litsing tsa Tlhabollo ea Batšoaruoa, ea khakhathiloeng kapa ho ea setsing sa kokelo.



Chief Officer Bokang Ramotena.

**LESOTHO CATHOLIC BISHOPS' CONFERENCE
CATHOLIC SCHOOLS SECRETARIAT
P.O. Box 80, Maseru 100, Lesotho, Southern Africa
E-mail :bmosuoe@lcbc.org.ls
Office of the Educational Secretary**

ADVERTISEMENT FOR VACANCY IN CATHOLIC SCHOOLS SECRETARIAT

Applications are invited from suitably qualified candidates for the following position tenable in the Teaching Service in Catholic Schools Secretariat.

JOB TITLE : **ASSISTANT EDUCATIONAL SECRETARY**
NO. OF POSITION : **1**
DEPARTMENT : **ACCOUNTS OFFICER AT CATHOLIC SCHOOLS SECRETARIAT**
NATURE OF CONTRACT : **PERMANENT**
RESPONSIBLE TO : **EDUCATIONAL SECRETARY**

1. JOB DESCRIPTION

- Ensure proper planning, recording and reporting of finances;
- Ensure financial and budgetary control are in place;
- Ensure that external audit of finances is done on yearly basis;
- Present to the Educational Secretary financial matters;
- Help the schools to straighten out their accounting systems and
- Ensure that internal audit work is done to prevent errors and irregularities in schools as well as the office finances;

2. KEY DUTIES AND RESPONSIBILITIES

- Justify, initiate and report on all development projects un-

dertaken;

- Collect, analyses data and write projects documents;
- Identify needs for physical, financial and general amenities and resources by: a) visiting schools and b) receiving and investigating requests from schools for facilities;
- Prepare and present reports on projects to Educational Secretary and donors;
- Deputize the Educational Secretary whenever the educational Secretary is absent;
- Do any other job assigned by the Educational Secretary.

3. KEY COMPETENCES AND SKILLS

The job requires human relation skills and ability to get along and work well with other people. It requires a high degree of inventiveness and mental alertness, emotional maturity and stability. Computer literacy and Driver's license will be an added advantage.

4. QUALIFICATIONS AND EXPERIENCE

Bachelor of Education in business Education with at least 5 years experience in teaching service.

5. SUBMISSION OF APPLICATIONS

Applications, including certified copies of relevant qualifications, registration certificate, two reference letters and copy of IDs, must be submitted by hand at Catholic School Secretariat on or before 6th February 2024.

Selemo sa 2024 se qalile

Tšeliso Thakholi

Bacha ba heso, kea le lumelisa le ho le amo-hela ka liatla tse peli selemong sena se secha seo ka mohau le lerato la Morena Molimo, a re thusitseng hore be o ntse a re hauhetse hore e be re se bone. Ha se ka bohlale ba rona empa ke ka mohau oa hae. Ke tšepa hore le lona le se amohetse ka mofuthu lipelong tsa lona. Re ka etsa phoso e kholo ha re ka lebala ho leboha ka tsela e khethehileng, bohlophisi ba koranta bo re fileng seotlo sena sa bacha e leng moo re thakelanang ka malebela, ho tsebahatsa likhoebo tsa rona le ho hlahisa litalenta tsa rona tse fapakaneng. Rea leboha 'me re kopa hore Morena Molimo o 'ne o ba eketse matla le selemong sena se secha.

Ha ho le joalo bacha ba heso, ntumelleng ke re ho lona le selemong sena se secha tlohong bohle seotlong sena sa bacha, ka litsebo, malebela, litalenta, mefuta eohle ea likhoebo tsa lona le lineho tsohle tseo Morena Molimo a le fileng tsona re tl'o li sebelisa ka tsela eo li tla beha litholoana tse monate bophelong ba lona. Bacha re hopole hore tsohle tse ntle tseo re li etsang ebe tlotlisong ea lebitso la Morena. Ke boele ke le hlokomelise selemo se sa qala hore bacha bohle ba lokela ho nka karolo litabeng tsohle tsa seotlong sa bacha.

Ke rata ho le hlokomelisa hore ha ho na mocha ea selehe ho hang! Empa Morena a re file lineho tse fapakaneng hore re li sebelise molemong oa rona le bana ba bang babo rona. Lineho tseo Morena Molimo a u fileng tsona u se ke oa ikoalla ka tsona u le mong, empa li tsoele le bacha ba bang molemo e le hore li tle li u atlehele.

Ha re hetla morao re



sheba selemo sa 2023 re ka re e bile selemo se likatleho le liqholotso tse ngata ho bacha ba bang. Bacha ba bang ba ile ba atleha ho phethahatsa litoro tsa bona tsa nako e telele, athe ka lehla-koreng le leng, ba bang bona ba ile ba iphumana ba aparetsoe ke mathata a mefuta-futa hoo mere-ro ea bona e metle e sa kang ea atleha. Bacha ho'a lokela hore moo lintho li sa kang tsa tsamaea hantle ngoahola, re iphe tšepo le sebetse sa

hore ka matla ao Morena Molimo a tla re fa ona selemong sena se secha re tla atleha. Ho bacha bao e bang ba ile ba atleha litorong tsa bona, ke re tiisang haholo selemong sena e le hore katleho ea lona e tle e tsebe ho tla tsoela bacha ba bang molemo.

Kajeno re qalile selemo se secha sa 2024. Ebe merero le litoro tsa rona ke life ka selemo see? Le hopole bacha hore selemo sa 2024 ke selemo sa khoebo. Ke selemo

seo ka sona bacha ba lokelang ho ema ka maoto ho ikopanya le ho ithehela likhoebo, molemong oa ho loantša tlala le bofuma.

Re bona ngoahola 'muso o khahlametsa bacha ba bang ba seng ba ntse ba e-na le likhoebo, ka mekhhoa ea ho li hollisa e le hore li tle li tsebe ho tsoela bacha ba bang molemo. Re thoholetsa taba ena haholo 'me re kopa hore 'muso le selemong sena se secha o 'ne o shebe bacha ka

leihlo la mohau. Taba ena ea liphallelo ho bacha ke khothaletsa hore e ke e fokotsoe, empa bacha ba thusoe ka mekhhoa ea ho itšoarella ka matsoho. Bacha ba na le litsebo tse ikhethang mafapheng a fapakaneng a bophelelo, 'me se hlokalang ke hore ba thusoe ho iketsetsa.

Ke qetella ka hore feela ho lona bacha, e le hore selemo sena se secha se tle se re tsoele molemo ke kopa hore le ele hloko lintho tse na tse latelang, ntlha ea pele ke botšepahi kaha motho ea tšepahalang o etsa hore batho ba bangata ba ikutloe ba bolokehile ha ba e-na le eena. Ntlha ea bobeli ke tlhompho, itlhompho u le mocha u tle u tsebe ho hlompheba ba bang hoba u ke ke oa fana ka seo u se nang sona. Ntlha ea ho qetela e kholo ho feta tsohle ke lerato. Mocha a k'u le ke ka hohle ho rata batho ba bang, 'me u se ke oa ba khesa ka ho ea maemo a bona. Rata motho e mong le e mong joaloka ha e le sebopuo sa Morena Molimo. Molimo o boloke bacha ba naha ena, 'me o ba sitse ka tsohle tseo ba li hlokanang selemong sena se secha!

O amohela basebetsi

STAFF

Mookame li oa Kamphani ea Mazenod o

ile a amohela basebetsi kamor'a matsatsi a liphomolo tsa Keresemese, ka la 2 Pherekhong monongoa.

O ba khothalelitse ho

kena tšebetsong ka mafolofolo selemo se sa qala tjena, e le hore Kamphani e tle e hole kaha katleho ea eona ke ea bona. O itse le hoja ho bile le liqho-



lotso tse ngata selemong se fetileng, ba ile ba atleha ho se feta ka hona le selemong sena ba 'ne ba tšoare kathata joalo.

Tšireletso ke ntho ea bohlokoa-solooe

Nthabeleng Seithleko

Muso o lokela ho sebetsa ka matla ho loanela tšireletseho ea bahiri lifemeng molemong oa polokeho ea mesebetsi ea Basotho. Tsena li boletsoe ke Mongoli-Kakaretso oa Mokhatlo oa Unite Solong Soloole, puisanong le koranta, ka la 4 Pherekhong monongoaha.

O re likopanong tse 'maloa tseo mokhatlo oa habo o bileng le tsona le bahiri, ba seboko ka tlhokahalo ea tšireletseho ea bona le methati e melele e lateloang ha ba lokela ho fumana litšebeliso. O re ba re seo se ama khoebo tsa bona kaha ba

sitoe ho fihlisa mesebetsi ka nako.

A bontša hore ba re e bang 'muso o sa ikeletse hore litšebeliso li fumanehe 'nqa e le 'ngoe, seo se tla susumetsa hore ba koale mesebetsi ho ea tsetela linaheng tseling. A mang a mabaka a etsang hore khoebo e be lesisitheho lifemeng ke ntoa e lipakeng tsa Naha ea Ukraine le Russia kaha e ama mebaraka ea Amerika 'me bahiri ba se ba tšabela Afrika Boroa.

O re leha maemo a le boima hakaalo hona joale ho bonahala lifeme li ntse li buloa hanyane ka hanyane e leng se tla thusa tlhahisong ea mesebetsi le phokotseho ea litlole tsa molao. Ba re leha ho le joalo ba sitoe hore ba re 'muso o ntse o sebetsa litaba kaha ho se nko ho tsoa lemina.

O itse e bang mesebetsi ea lifemeng e ka koaloa ho tlo ama khoebo, kholo ea mekhatlo le kabo ea toka ho ba ann-goeng ke bahiri 'me seo se tlo etsa hore botho ba mokhatlo bo theohe.

A re ba boetse ba tl'o imeloa ke litaba tsa kabo ea toka hobane ba na le liakhente tseo ba li lefang ho buella basebetsi. O re lifeme ke tsona tse ka namolelang Basotho kahara tlala le tlhokahalo ea mesebetsi hobane ho hiroa palo e ngata ea sechaba.

O ipilelitse ho 'Muso oa Lesotho ho tšoara ka matla ho thusa Basotho ho tsoa kahara boemo bona molemong oa kholo ea moruo oa naha.

Ho sa le joalo, Motlati oa Mongoli-Kakaretso oa NACTWU, Ts'epang Makakole, o supile hore

bona e le mekhatlo e buellang litokelo tsa mantlha tsa basebetsi ba lifemeng, ba tšoare kathata ho bona hore litokelo tsa basebetsi li eloa hloko, ka hona ba batla ho bona 'muso o mema batseteli ba bangata ho tla tsetela Lesotho molemong oa tl-

hahiso ea mesebetsi.

O re tlhokahalo ea mesebetsi lifemeng e ama bophelo ba batho ba bangata hoo le khatello ea maikutlo e ka bang teng. A re bahoebi ba lifeme ba tšepahalle basebetsi molemong oa moruo o potolohang.



Mongoli-Kakaretso oa Mokhatlo oa Unite Solong Soloole.

Basali ba tšehetsane-Phamotse

Nthabeleng Seithleko

Moetapele oa Mokha oa Bosebeletsi ba Sechaba (UAT), Dr. Mahali Phamotse, o re basali ba lokela ho tšehetsana le ho tšoarana ka matsoho litabeng tsa boetapele lipolotiking molemong oa kholo ea bona. O hlalositse tsena, puisanong le koranta ka la 3 Pherekhong monongoaha.

O re esale e le setho sa paramente lipalo tsa basali li'a fokola 'me seo se fokolisa liqeto tse ka etsoang molemong oa bona. O re ke nako ea hore basali ba tšoare ka matla litabeng tsa naha molemong oa tsoelopele kaha ba bopiloe ka ho tsotella, lerato le tlhokomelo.

Ke boetapeleng ba hae moo a tla sebetsa ka thata ho bona hore basali ba ema ka lipalo tse ngata mabatoeng 'moho le

bacha. O re sena se tla ba thusa hore lipalo ka paramenteng li lekane ho nolofatsa liqeto tse

etsoang molemong oa sechaba.

A re e bang tsamaisong batho ba ka sebet-

sa ka thata ho sebeletsa litaba tsa teka-tekano mafapheng ohle, ho tla thusa bophethahatsing ba meralo le ntlafalo ea sechaba. A re sena se tla thusa hore basali ba kenelle liqetong tse etsoang molemong oa bona, kaha e le batho ba matla.

Phamotse o re seo a se hlokometseng e le khaello ho basali ke ho se tšepane le ho nyefolana ha ba lokela ho tšehetsana. A ipiletsa ho basali ho se shebe motho ea ba etelletseng pele ba tšehetsane hore ba ntlafale le ho sebelisa litsebo tsa bona ho intlafatsa bophelong ba bona.

A re basali ba se itumelle ho sebelisoa hampe kaha taba eo e ba sitisa ho tsoelapele kapa ho kenela litaba tse ka ba ntšetsang pele, ka ho huleloa morao haholo ho kena litabeng tsa marato.

A bontša a se na khoao ea hore basali ba ka kena tsamaisong e leng se tla etsa hore ba atlehe bokamosong ba bona le boetapeleng. A re melao e entsoeng ho sireletsa

basali ha e sebetse hobane batho ba bang ha ba ikuke e le karolo ea litaba tseo.

H'a phethela o itse basali le banana ba qalelle ho its'epa, ho ts'epana le ho its'epahalla hore ba tsebe ho ntlafala litabeng tsa boetapele. Bohle e be karolo ea melao e fetohileng ho sireletsa basali joaloka melao ea bojalefa o tla thusa hore teka-tekanyo e bonahale malapeng a mangata.

E mong oa basali ba tummeng lipolotiking, 'Mamohato Tšotetsi o re ha ho bonolo ho hlalella ha u le mosali lipolotiking kaha u tla qalella ho olosoa, ho nyefolana, ho nyatsoa ke basali ba bang le ho bua lipuo tse se nang motheo. O re ka nako e telele o nyotobetsa ke basali ba bang hoo a eeng a nyahame empa kaha a e-na le lerato la seo a se etsang o ipha matla.

O re basali ba bangata ba Basotho ba matla ho ka fetola naha ena, ha ba ka khaotsa lihlong, ho nyefola le bosomi.



Moetapele oa Mokha oa Bosebeletsi ba Sechaba (UAT), Dr. Mahali Phamotse.

Basotho ba ele hloko

Nthabeleng Seithleko

Basotho ba lokela ho sheba hore na ba ja letsoai le lekae lijong kaha le le kotsi le bakela batho mafu a mangata. Tsena li boletsoe ke Mothehi oa Dazzzzling Food, Seriti Molapo, ea thusang batho ho theola lefura 'meleng ka tsela e nepahetseng ea ho ja, ka la 3 Pherekhong monongoaha.

O re lijo tse letsoai, linoko tse natefisang lijo le nama e khubelu li baka phallo e phahameng ea mali, ka hona ho fokotsa letsoai lijong ke ntho ea bohlokoa le ho leka



Mothehi oa Dazzzzling Food, Seriti Molapo.

ho baleha lijo tse ka makolokoting kaha li nka nako e telele li lutse li sa sebetse, li bile li lokisitsoe ka matsoai.

O re Basotho ba lokelela ho ja lijo tse se nang letsoai, 'me ba je li tsoa mobung eleng meroho e metala, e kang sepaile, rapa, cabbage le tsona khothaletso ke hore li jeoe li le joalo hobane li atleha ho fetela maling li theole phallo e phahameng ea mali.

A re batho ba lokela ho loanela ho tlhotla matsoai a mangata 'meleng, ka hoo ba je litholoana khafetsa molemong oa bophelo bo botle. A boela a re ba je papa e ts'ehla kaha e thusa ho hlatsoa pelo le ho aha 'mele. A ipiletsa ho batho ho qarella ho fetola bophelo ba bona hona joale ho baleha ho angoa ke mafu.

Khoeli ena o e nka e le ea bohlokoa ea ho hloekisa 'mele ho ntša litšila tsohle tse bakiloeng ke ho ja lijo tse sa lokeleng 'mele. A re metsi a bapala karolo e kholo sebakeng sa bohloeki le polokeho ea bophelo bo botle kamehla.

O supile mekhoha ea ho pheha lijo e le hlokolosi e ka baka le mekhoha ea ho li tšoara kapa ho li hloekisa. A re bohloeki ke ntlha ea bohlokoa eo batho ba bangata ba lokelang ho e lemoha hore ke tlhoko ea mantlha ho baleha mafu a fetang ka lijo.

O itse ba sebetsa haholo ka ho ruta batho ka ho pheha lijo tse ntlafetseng, ho li sebelisa ho loants'a mafu molemong oa bophelo bo botle.

O boetse o ngola mefuta ea lijo eo motho a lokelang ho e latela ho theola 'mele, ho theola lefu la phallo e holimo ea mali le tsoekere. A re lijo tsohle li tloaeloa ke 'mele ka hoo ho bohlokoa hore batho ba se ke ba nyahamela ho sebelisa lijo tse sa butsoang ba tsebe ke hona moo pheko e leng hona teng.

Bolebali bo ama bohle

Nthabeleng Seithleko

Bolebali bo ka biphonahatsa mekhahlelong eohle ea sechaba ho sa natsoe lilemo le boleng ba motho. Tsena li hlahele tse puisanong le

Mohlahlobi oa Booko le Methapo, ho hlaha setsing sa Maluti Neuro Dignostic, Dr. 'Matšepang Tsoako, ka la 3 Pherekhong monongoaha.

O re bolebali ke ket-sahalo eo motho a sitoang ho hopola se etsahetseng kapa liketsahalo, 'me a qetelle a eba le

bothata ba ho lobokana kelello hoo tahlehelo e bang teng. A re motho a ka bonahala ka ho sitoa ho kenya taba e ncha kahare ho booko kapa ho e hopola.

Batho ba seng ba na le bolebali bo atileng ba qetella ba qoqa ba le bang, ba lahlehelo ke mohopolo hoo motho a

lebalang sebaka seo a phelang ho sona. A re ba bang ba rehlooa ka boloi kapa liketso tse se nang molemo ka lebaka la bolebali.

H'a tsoelapele o re le bana ba na le bolebali moo ngoana a ka qetellang a ema tsii nako e ka isang metsotsong e 10 a sa utloe a sa bui hobane a lebetse seo a lokelang ho se etsa, 'me hoo ho ama kholo, thuto le bokamoso ba hae.

O bontša batsoali ba lokela ho ema ka maoto ho hlahloba booko ba bana e le hore ba tsebe mefokolo ea bona. O itse bothata bo boholo ke ha booko ba motho bo sitoa ho sebetsa hantle ka lebaka la methapo e sitoang ho fetisa molaetsa.

H'a phethela o re ke nako ea hore batho bohle ba eme ka maoto ho hlahlobela mafu molemong oa bophelo bo botle, 'me ba je lijo tse ahang booko le ho etsa boikoetliso bo thusang hore booko bo lule bo sebetsa khafetsa joaloka ho tsamaea nako e telele.



Mohlahlobi oa Booko le Methapo, ho hlaha setsing sa Maluti Neuro Dignostic, Dr. 'Mats'epang Tsoako.

Marang-rang a ntlafatsa thuto

Nthabeleng Seitlheko

Moithuti Se-kolong sa Botho University, Teboho John Ramakhotla, o thakhotse sehlahisoa se tataisang baithuti ba Likolo tse Phahameng ho ithuta 'Biology' ba sebelisa marang-rang. Tsena li hlaheletse puisanong le koranta, ka la 3 Pherekhong monongoaha.

O re o entse sena e le khahlametso ho baithuti ba bangata ba nang le marang-rang hore ba tsebe ho a sebelisa sebakeng sa ho ithuta, ho qoba ho senya nako ba ntse ba bala kapa ho ngola lintho tse se nang thuso marang-rang.

O re thuto ea mahlaleha e sebetsoe hantle kahar'a naha 'me ke ka



hona e tlameha ho rutoa joaloka tse ling hobane ke ka eona palo ea lingaka e ka phahama kahar'a naha. O re thuto ena e tla

fanoa ho sebelisoa marang-rang a Facebook le WhatsApp, ka lipuisano le litšoantšo-pono.

A re ba tl'o romella

bana lipotso marang-rang 'me e se e le bona ba tla ikhanna ho etsa mosebetsi oa sekolo, kaha ho ithuta ka marang-rang e

le motho ka bo eena ea etsang mosebetsi ntle le tšusumetso ea mang kapa mang.

O re morero oa bona ha se ho sebetsoa Maseru fela empa ba rata ho anela litereke tsohle le likolong tse ka lithabeng moo qholotso e khole e leng tlhokahalo ea khokele ea marang-rang ka hona o khothaletsa 'muso ho hloma litora tse 'maloa hore batho ba hokele marang-rang kaha menyetla ea bophelo e le mengata kahar'a ona e le hore baithuti ba joalo ba se ke ba salla morao.

Ba ipiletsa ho 'muso ho kenya leano la tšebeliso ea thuto ea marang-rang ho kenyeletsa bana bohle litabeng tsa thuto hobane bophelo ba hona joale bo itšetlehile teng.

H'a phethela o itse thuto ea 'Biology' ke thuto eo bana ba bangata ba e ratang empa bothata ke ho se utloisise tsela eo e rutoang ka eona. Ka hona ba tl'o sebetsoa ka thata le ho e ruta ka puo ea Sesotho le Senyesemane.

Ho latela boithuto ba fumane hore Naha ea Lesotho e saletse morao litabeng tsa ntlafatso ea thuto e fanoang ka marang-rang.

E mong oa litichere se-kolong sa Ha Tlali, Malefetsane Leanya, o supile hore marang-rang ke karolo e nepahetseng ea ho fetsetsa thuto ho bana kaha a ba thusa ho ntlafala le ho tlisa thahasello ea ho ithuta ho ea pele. A re re phela nakong eo lefatše le fetohileng 'me batsoali ba lokela ho tšehetsa thuto ea bana ba bona ka hohle hohle molemong oa katleho ea bona. A re hoo e leng qholotso ke likolo tseo ho tsona ho se nang motlakase molemong oa ho hokela marang-rang le bana ba mafutsana ba se nang mehala ea thekeng ho ithuta empa ba na le khahleho.

O bontšitse hore 'Muso oa Lesotho o lokele ho sireletsa thuto ka mekhoha eohle ka ho atametsa lisebelisoa ho bana ba hloakang likolong.

Banna boeang sekoele-Mahula

Nthabeleng Seitlheko

Banna ba lokele ho fetoha basireletsi ba sechaba, ho boulela khotso ea naha le boleng ba sechaba, molemong oa ntlafalo le khole ea naha. Tsena li boletsoe ke Mothehi oa Mokhatlo oa Man Up, Mpho Mahula, puisanong le koranta ka la 4 Pherekhong monongoaha.

O re lilemong tsena tse 200 sechaba sa Basotho

se ne se theoe, ke nako ea boitlhalobo bo tebileng ba Basotho hore sechaba se khutlele mekhoeng ea sona ea pele ea phelisano. A re hoo ho tla thusa hape hore banna ba ke ba hlahlobe mekhoha e neng e sebelisoa khale ea ho phelisana.

O re banna ba lokela ho bonahala ka ho nka boikarabelo kahare ho metse ho sireletsa, ho namolela le ho nka khato molemong oa bophelo bo lokohileng ba sechaba. O itse nakong ena ba tl'o tla ka maano a tla thusa banna ho kopana

'moho ho buisana ka litaba tse ba amang molemong oa ho nena hara litaba tse ling tlhekefetso.

A bontša tlhokahalo ea mesebetsi e supitjoa e le e 'ngoe eo e leng sesosa sa litlo tsa molao empa bona e le mokhatlo ba re banna ba se itšireletse ka seo kaha ba lokela ho tla ka mekhoha eohle ea boipheliso ho hlola tlala le bofuma.

O itse motho hore a phele ha se ka ho hiroa empa a ka itšebetsa e le karolo ea bointlafatso le boipheliso, ho nena bosholu, lipolao le

lintho tse sa aheng.

O re ba hloka banna ba nang le lerato, ba holisang malapa a bona. A ba tholetsa kaha selemong se fetileng ha b'a utloa litlaleho tse ngata tse entsoeng ke banna tsa tlhekefetso kapa lipolao. O re ba motlotlo ka seo kaha banna ba se ba alosana ka bo bona.

O re banna ba lokela ho tholetsoa hore ba tsebe ho tiisa litabeng tsa sechaba, ba holise bana ba bashanyana ka tsela e nepahetseng ho ba thusa ho ba le bokamoso bo botle kaha ba tla qopitsa boitšoaro bo botle ho batsoali ba bona.

H'a phethela o itse ba tla tšoara 'moka le litholisano tse ntlafatsang banna le bana ba bashanyana, ho ba rupela ka litaba tsa boetapele le boikarabelo ba bona. E le mokhatlo ba tšoensoe le ke tsela eo bana ba bashanyana ba ipolaeang ka eona le ts'ebeliso e atileng ea lithetefatsi.

Selemong sena sa Moshoeshe, ba re sekoele ho banna bohle le ho hohetsa marena ho thusa Basotho ho khutlela mekhoeng ea bona.



Litlholisano li'a thakhoaha



ba tsoere lesika ka tsela e nepahetseng. O re ke tsela e 'ngoe e sebelisoang ke mokhatlo e le boithlahlobo le hoja e se mosebetsi o tlamang likiri empa ke morero o teng kahare ho molao oa motheo.

Thinyane o re o motlotlo hore lihoai tsa Farelane le Seiboko ha li'a nyahamisoa ke maemo a litheko tse tlase tsa boea kaha ba na le lerato la ho phela ka nku le poli, ba ntse ba tsoelapele ka leeto le joalo.

O bile a ipiletsa ho bacha hore ba tsebe Farelane le Seiboko e hloka bacha kaha ba ntse ba e-na le liphaka le menahano kapa mahlale a ho ntlafatsa bophelo ba bona. O re Farelane le Seiboko ea phelisa hobane ka eona motho a ka thehela ba bang mesebetsi, ho phahamisa moruo oa naha le khoebisano le linaha tse ling.

Nthabeleng Seitlheko

Mookameli oa Naha oa Farelane le Seiboko, Mokoeni Thinyane, o re likiri li tsoere ka thata ho ithophela litlholisano tsa litereke tsa Farelane le Seiboko tse tla lebisa ho tsa naha moo sehoai se ipabotseng se tla tloha sebakeng se joalo se kiba-kiba ka chelete le lisebelisoa. O boletse tsena, puisanong le koranta ka la 3 Pherekhong monongoana.

O re molemo oa ketsahalo ena ke ho hlahloba hore na bao eleng litho tsa Farelane le Seiboko ba ntse



Lihoai li khothaletsoa ho ngolisa likhoebo

Nthabeleng Seitlheko

Lihoai tsa Hansen Farming tse hoebang ka bo-mmalitšibana le meroho, li khothaletsa lihoai ho ngolisa likhoebo hore li tsebe ho tsebahala le ho tsebahatsa lijo kapa ho li khetholla. Tsena li boletsoe ke Ramatlotlo oa khoebo 'Mahlompho Masheane, ka la 3 Pherekhong monongoaha.

A re lihlahisoa tsohle tseo ba li bolokang ke tseo ba itl-hahisetsang 'me li khethohile ka mekhoha ea polokeho le tsela eo li shebahalang ka eona. O re ho fihlela hona joale khoebo ea bona esale e khetholoha ba atleha ho rekisa likhoebong tsohle



le ho anetsa lihlahisoa tsa bona.

O re sena ba ile ba se etsa kamora ho hlokomela

hore ha ho na mesebetsi kaha e le bacha, ba tsetela temong molemong oa ho iphelisa. A re hona joale

ba se ba hirile batho ba ba thusang ho boloka lijo le ho hlabisa likhoho molemong oa polokeho e hloekileng ea lijo.

A re ho bohlokoa hore lihoai li be le mabitso a khoebo kaha ho thusa ntlafaleng ea moruo, ho lefa lekhetho le ho khetholla lihlahisoa ka-har'a tse ling.

O itse ba qalile mosebetsi

ona ka selemo sa 2022 ba itlhabela likhoho empa ha joale ba se ba hlabaloa ke litsebi ho baleha hara tse ling litšenyehelo.

Ba re hona joale esale maqalong a selemo se secha bacha ba itšebetse ba se ke ba lebella ho hiroa, ba tsetele ho temo-thuo le temo ea lijalo kaha ho qala ha nyane ho le bohlokoa.



Bakriste ba ketekela selemo se secha

Tseliso Thakholi

Litšebeliso tse khethehileng tsa ho khaola le ho bula selemo se secha, li ile tsa ketekoa ka mokhoa o moho ke bakriste ba Parish ea Maria Mofumahali oa Lefaatše, Mazenod, ka la 31 Tšitoe ngoahola, moo li neng li eteletsoe pele ke mong'a Parish Fr. Patrick Khoaele OMI a tlatsitsoe ke Fr. Clement Tšita OMI le Modiakone Bro. Justinus Moloi OMI.

Litšebeliso tsena li ile tsa simolla ka Sakramente ea Pako. H'a fana ka thuto mabapi le Sakramente ea Pako Fr. Patrick Khoaele OMI o boletse hore ke ho itekola le ho ipatla mabapi le likamano tsa rona le

Morena Molimo, batho ba bang le ho rona. A re Sakramenteng ea maipolelo ha ho ea qobelloang, 'me motho o tla ka bolokohi. "Ka maipolelong ke ka moo ho hlapuoang hore motho a hloeke. E tsoe motho ka mong o tseba se ka pelong ea hae." A rialo. A re re na le Morena Molimo ea re ratang le ho re tsofella, leha re tla re tšoa-na le ngoana ea lehlasoa o re busetsa bothong.

Kamorao ho maipolelo e bile tšebeliso ea lentsoe le pina, moo mokriste ka mong a neng a ema aletareng kapel'a phutheho, ho hlaloesetsa phutheho likatleho le liqholotso tseo a fetileng kahar'a tsona selemong se fetileng. Bakriste ba ne ba boetse ba leboha Morena Molimo ea ileng a ba sireletsa selemo kaofela, le ho ikopela mahlohonolo a selemo se secha.

Khothatsong ea hae, Fr. Clement Tšita OMI o itse

e re kaha re sa tsebe tsa hosane ke ka lebaka lena ha selemo se fela, re tlang motlotloaneng oa Molimo, ho tla leboha ka tsohle tseo a re etselitseng tsona le hore re qale selemo se secha re le maotong a morena.

A re re qala selemo sena hobane re tlii'o lokafatsoa ke morena, 'me "ha re emeng re qale selemo sena se secha, re re mathata a rona ka malapeng re tla a hlola hobane re eme le Jesu. Kaofela ha rona rea ipotsa hore na ebe selemo sena se re tlela joang. Jesu o re se ke oa khathatseha, tšepang Molimo hobane o tseba seo re se hlokang. Batlang tsa 'muso oa Maholimo." Ke Fr. Tšita eo. Ke hona tšebeliso ena moo bakriste bohle ba ileng ba fuoa tlhohonolofatso e khethehileng ea likatleho, mahlohonolo a selemo se secha le ho ba haeletsa ho maraba ohle a e mobe.

2023-2024 SELEMO B Boiponahatso ba Morena

Isaia 60,1-6

Pesalema 71

Ba-Efese 3,2-3.5-6

Matheus 2,1-12



Khothatso

Balichaba ba fetohile majalefa

Mokete ona ke sehopotso sa letlotlo la Kriste le bontšitsoeng Balichaba ka mekhoha e meraro; ba Bohlale ba Bochabela, Tlhatsuo ea Morena le mohlolo oa pele oa Cana. O thomiloe Kerekeng ea Bochabela eaba o fetela Bophirimma moo o ketekoang haholo mabapi le ba Bohlale ba Bochabela.

Thuto ea Pele ho tsoa Bukeng ea Isaia ke qaleho ea likhaolo tse tharo tse hlaosang Jerusalema e ncha, moo letlotlo la Morena le se nang ho bonahatsoa feela ho Bajudi empa le ho Balichaba. 'Nete ena e netefatsoa ke temana ea ho qetela, "ba tla tla, ba bofile gauda le moarubelo, 'me ba tumise lithoko tsa Morena." (Isaia 60:1-6) joalokaha Evangelii ea Matheus le eona e netefatsa "Ba Bohlale ba Bochabela ba tla Jerusalema" (Matheus 2:1) eaba ba fa ngoana Jesu "limpho tsa gauda le moarubelo." (Matheus 2:11)

Ke ka lebaka la'ng ha ba ile ba mo fa gauda le moarubelo e se litaemane? Morero oa bona e ne e le ho fana ka limpho tse fanang ka molaetsa; gauda e ne e lokeloa ho fuoa Khosi, hona ho bolela hore ba ne ba mo nka e le Khosi. Moarubelo ke mpho ea moprista, ba ne ba nka e le moprista eo e leng 'muelli lipakeng tsa motho le Morena. Mira o ne o sebelisoa bathong ba seng ba hlokaetse, le hoja ba ne ba nka e le Khosi le moprista oa bona ba ne ba tseba hore o tla shoa e le ho pholosa lefatše.

Joalokaha Mangolo a Halalelang a bolela bohle ba bangata ba ile ba tla ho mo khumamela, kamor'a ba Bohlale ba Bochabela re ka bua ka balisana le bara le barali bohle ba Morena Molimo ba batlang 'nete e fumanoang ho Morena Jesu.

Lengolo la Paulosi ho Ba-Efese (Ba-Efese 3:2-3, 5-6) le bolela hore le hoja pholoho ea Balichaba re e tsebisitsoe kajeno, pele ho Tsoho ea Kriste e ne e le misteri. 'Nete ena e ile ea tsebahatsoa ho tloha Testamenteng ea Khale empa sechaba se ile sa koaloa mahlo ho fihlela nako e fihlile. Hona joale ka grasía ea Molimo Ntate le matla a Moea o Halalelang misteri ona o ile oa senoleloa baapostola le bapofeta. Paulosi o ile a laeloa ho tsebahatsa grasía ena ea Morena lefatšeng. Le lona ka lebaka la mohau oa Morena le keneletse hona Balichabeng moo 'me le "fetohile bajalefa, litho tsa 'mele o le mong le na le kabelo litšepisong tsa Kriste tse hlahang Evangeling." (Ba-Efese 3:6)

Evangelii ea Matheus eona e fana ka tlhaho ea Kriste ea hlahileng mehleng ea puso ea Heroda, 'me khahlanong le seo ba bangata ba lumelang ho sona ho latela lefu la Heroda Kriste o ne a lokela ho hlaha lilemo tse 'ne pele. Banna bana ba Bohlale ba Bochabela ba ne ba e-na le tsebo e khethehileng haholo mabapi le leholimo ke ka hona ba ileng ba bona naleli 'me ba e latela.

Taba ena ea bona e boela e netefatsa hore Kriste ke Khosi kaha esale ba ntse ba batla ho khumamela Khosi. Kamor'a ho utloa hore Khosi e tla hlaha kahar'a sechaba sa Bajudi, Heroda o ile a tšoha hobane a ne a sa batle ho lahlehela ke bokhosi ba hae. H'a qeta ho botsa baprista ba baholo le baholo a fumana hore khosi eo e tla hlhela Betlehema e Judea e leng sebaka sa khosi Davida.

Heroda a laela ba Bohlale ba Bocheba ho tla mo tsebisana moo ngoana a leng teng, le hoja morero oa hae e ne le ho tla 'molaea e se ho mo khumamela. Ha naleli e se e fihlile moo ngoana, 'm'ae le ntat'ae ba leng hona teng ba ntša limpho, sena se re bontšisa borena le bomessia ba Kriste le hore Balichaba le bona ba bilelitsoe ho mo khumamela.

Kajeno e se hosane ha re hlahlobeng lithoko tsa rona tsa moea 'me re inehela ho Morena ka ho amohela bofokoli ba rona e le hore letlotlo la Morena le tle le khanye ka ho fetisisa. Grasía ea Morena e ke e matlafatse e mong le e mong oa lona matsatsing, libekeng le likhoeling tse tlang ho tla.

Bahalaleli har'a beke

- | | |
|---------------|--------------------|
| 8 Pherekhong | TLHATSUO EA MORENA |
| 9 Pherekhong | Adrian, Abbot |
| 10 Pherekhong | William of Bourges |
| 11 Pherekhong | Alexander |
| 12 Pherekhong | Martina |
| 13 Pherekhong | Elian |

Ha ba beoeeeeeeeeeee!

THE DIOCESE OF MOHABE'S HOEK Priestly & Diaconate Ordination



REV DC JUSTINUS MOLOI OMI (from Parish of Emmaus - Makhakhe)

"How can I repay the Lord for all His goodness to me?" [Psalm 116:12]



BR AUGUSTINE MOUISE KAPHE (from Parish of Mount Carmel - Mpharane)

"I can do all things through Him who strengthens me" [Phil 4:13]



BR PAUL MOLEFI SEBILLO (from St Patrick's Cathedral)

"Then I heard the voice of the Lord, saying, "Whom shall I send and who will go for Us?" Then I said, "Here am I. Send me!" [Is. 6:8]

10 February 2024

Parish of Emmaus, Ha Makhakhe

09:30am



Ordaining Prelate: Bishop JJ Tihomola SCP

Fr Matlosa +26659396082

Fr Ntlhanngoe +26663309201

Romaboys e tjametsoe ke selepe

Tšeliso Thakholi

Tikoloho ea Roma e ile ea tsebaha haholo ka bolo e tsoileng matsoho lilemong tsa ho feta hoo lihlopha tse kang Romaboys, Rovers le Manonyane li neng li ipabola le ho ikutloa-

hatsa ka liqi tsa tsona, mekhahlelong e fapaneng ea lihlopha tse kholo. Morao tjena ho bonahala e fetohile setšehisa, ho latela ka moo ho banahalang ho rathoa ke selepe ha lihlopha tsa teng tse kholo, e se e batla e fetohile tloaelo ha selemo sa lipapali se fela.

Sehlopha sa bolo ea maoto sa Romaboys, se ileng sa tsejoa le ho

ratoa haholo ka papali ea sona se haufi haholo le ho lumelisa ha lipapali tsa Liki e ka Boroa ea A Division li fihla pheletsong selemong sena. Sehlopha sena se hula ka thata 'me se hlaha boemong ba ho qetela Lokong e ka Boroa ea A Division, ka lipapali tse robong se na le ntlha-kholo e le 'ngoe feela ka mokotleng.

Romaboys e se e na

le nako e telele e kene lihlopheng tse kholo tsa Mokhahlelo oa A Division, 'me e ne e lokela hore e be e se e tseba maqiti a lihlopha tse kholo tseo e bapalang le tsona. Ka bomalimabe se bonahala se futsitse sehlopha se sehlo sa Manonyane ka ho hloa papaling e 'ngoe le e 'ngoe. Potso e kholo eo batho ba ipotsang eona ke hore na e be

talenta ea bolo e felile Roma? E bang e felile ho tile joang hore Romaboys le Manonyane li finyelle lihlopheng tse kholo, moo hajoale li seng li bonahala li luba thankha?

E mong oa batšehetsi ba Romaboys, Thato Sello o boleletse Koranta hore talenta e teng, empa sehlopha sa bona se hloka tšehetso e matla ho tsoa ho bahoebi, ho holisa le ho matlafatsa litalenta tsa bahlankana. O re bahoebi ba tikoloho ea Roma le mathoko ba lesisitheho ho tšehetsa lihlopha tse kholo. A tiisa hore ke ka tšehetso feela lihlopha tsena li ka boelang tsa ipabola mekhahlelong eo li leng ho eona.

O re taba e 'ngoe e hlobaetsang ke ho bona linyeoe tse sa eng moriting liking ena ea A Division, moo lihlopha tsa A Division li iphapanyelitseng molao ka boomo oa ho bapalisa libapali tsa U20. "Joale ke linyeoe kamor'a linyeoe! Na re tla qeta?" Ho botsa Sello a bile a phethela ka hore haeba ho ke ke ha eba le pheotoho, sehlopha sa habo sa Romaboys se khutlela Mokhahlelong oa B Division, moo se leng tsietsing e kholo ea ho putlamela ruri joaloka Rovers.



A DIVISION LEAGUE 2023/24 LOG TABLE

SOUTH STREAM 17 DECEMBER 2023

POS.	CLUB	P	W	D	L	GF	GA	GD	PTS
1	Majantja	9	7	0	2	19	6	13	21
2	Members	9	6	2	1	16	7	9	20
3	FC Summit	9	5	2	2	16	12	4	17
4	Q. Highlanders	9	5	2	2	15	10	5	17
5	Swallows	9	5	1	3	12	10	2	16
6	05 United	9	4	1	3	14	14	0	13
7	Mahlaseli	9	1	5	3	12	15	-3	8
8	Qacha's Nek LMPS	9	2	0	7	12	17	-5	6
9	Quthing LMPS	9	1	3	5	9	18	-9	6
10	Roma Boys	9	0	1	8	7	23	-16	1

■ PROMOTION
 ■ PROMOTIONAL PLAY-OFF
 ■ RELEGATION

f @ lefa.co.ls

A DIVISION LEAGUE 2023/24 LOG TABLE

NORTH STREAM 17 DECEMBER 2023

POS.	CLUB	P	W	D	L	GF	GA	GD	PTS
1	Lilemela	9	6	2	1	16	7	9	20
2	Mzamane	9	6	1	2	16	7	9	19
3	Kick4Life Juventude	9	5	2	2	19	11	8	17
4	Maroala	9	5	1	3	11	6	5	16
5	Lits'ilo	9	5	0	4	13	13	0	15
6	Sehenehene	9	4	1	4	10	11	-1	13
7	L. Polytechnic	9	3	1	5	5	10	-5	10
8	Galaxy	9	3	2	4	8	9	-1	8
9	Rovers	9	1	1	7	4	13	-9	4
10	BB Warriors	9	0	3	6	2	17	-15	3

PLEASE NOTE THAT GALAXY FC HAS BEEN DOCKED 3 POINTS FOR LATE CLUB LICENSING APPLICATION

■ PROMOTION
 ■ PROMOTIONAL PLAY-OFF
 ■ RELEGATION

f @ lefa.co.ls

Likuena e simolla boikoetliso



Tšeliso Thakholi

Sehlopha sa Naha sa Bolo ea Maoto, Likuena, se simolotse boikoetliso ba sona Lebaleng la Bambatha, Maseru, ka 'Mantaha oa la 2 Pherekhong monongoa-ha e le ho itokisetsa ho tla bapala lipapali tsa sona tse peli tsa Machaba tsa setsoalle mafelong ana a beke.

Leha lotho e-s'o etsoe ke libapali kaofela tse bitsitsoeng ho hlaha lihlopheng tse fapakaneng tsa Liki e Kholo le tse bapalang kantle ho naha.

Papaling ea sona ea pele ea setsoalle, e tliil'o qothisana lehlokoa le Mambas ea Naha ea Mozambique ka la 6 Pherekhong monongoa-ha. Mambas ke se seng sa lihlopha tsa Tikoloho ea COSAFA, se phunyelelit-

seng ho ea litholisanong tsa Mohope oa AFCON, tse tliil'o bapalloa Naheng ea Ivory Coast ka la 13 Pherekhong ho isa la 11 Hlakola monongoa-ha. Mambas Mohopeng ona e Mokhahlelong oa L, moo e pannoeng le bompoli ba sireletsang sekola e leng Senegal, Benin le Rwanda. Haele papali ea bobeli ke moo Likuena e tlang ho bapala le Bafana Bafana ea Naha ea Afrika Boroa ka la

10 Pherekhong monongoa-ha.

Ho ea ka Raliphatlalato oa Mokhatlo o Moholo o Tsamaisang Bolo (LEFA), Monghali Mikia Kalati, sehlopha se itšebelelitse kahare ho lebala hore se fumane tlhompheho e se lokelang ho tsoa ho linaha tse ling, hore li ikutloe e le sehlopha seo ba lokelang ho bapala le sona. "Sehlopha sa rona se ile sa bontša

hore le sona ke sehlopha se sehlo se ka bapalang le naha efe kapa efe." A rialo.

A re le hoja mokoetlisi a e-s'o phatlalatsa lenane la moshoelella la libapali, ke bonyane libapali tse 22 tse tsoang kantle le kahare ho naha tse seng li qalile boikoetliso. A re ba bang ba bona ba menngoeng ke libapali tse ngata tse bapalang mekhahlelo e fapakaneng ea li-iki Naheng ea Afrika Boroa, feela boholo ba bona ba e-s'o bapalle lihlopha tse kholo tsa naha. A etsa mohlala ka Tumelo Shai ea ntseng a bapalla sehlopha se senyane sa Kaizer Chiefs le Tlotliso Phatile ea bapallang sehlopha sa Black Leopards.

Kalati a bontša hore Liking e Kholo ea naha, baikoetlisi ba boetse ba bitsitse sethibathibane sa Matlama e leng Monaheng Ramalefane le mohlaba-lintlha oa Lioli Tumelo Khutlang, kamor'a ho sebetsa hantle lipapaling tsa Liki e Kholo ea VODACOM ngoahola. A qetella ka ho ipiletsa ho libapali tse ling tseo e seng karolo ea Likuena, ho imatlafatsa ka ho sebetsa ka thata lihlopheng tseo ba leng ho tsona, e le hore le bona ka letsatsi le leng, ba tle ba iphumane ba bapalla sehlopha sa naha.

Lioli e tliil'o itsamaela bolacha

Tšeliso Thakholi

Sehlopha se ntseng se lihula pele lokong sa Lioli, se tliilo qala mokhahlelo oa bobeli oa lipapali tsa Liki e Kholo ka ho thulanya thebe le Matlama, Lebaleng la Bambatha, Maseru, ka la 21 Pherekhong 2024. Lena e tla be e le lekhetho la bobeli mokoetlisi ea ntseng a le mocha oa Lioli, Monghali Motheo Mohapi a etelletse pele sehlopha sena sa TY.

Empa Mohapi h'a mocha bokoetlising ba bolo ea maoto, kaha a ile a etella pele sehlopha sa LDF nako ea lilemo tse telele, ho fihlela a itokolla kamor'a ho phethela selemo sa lipapali sa 2022/2023, 'me a leba sehlopheng sa Lioli, moo a ntseng a sebetsa ka thata ho khutlisa seriti le tlhompheho ea sehlopha ka ho bona hore se khutlela mane moo se neng se tsejoa ka papali ea sona e tsoileng matsoho le ka ho hapa lipapali tsohle tsa sona. Ha joale Lioli e

kena mokhahlelong ona oa bobeli oa liki e hapile lipapali tse 10 kaofela, 'me ka mokotleng e bokelletse lintlha-kholo tse 33

Ha lihlopha tsena li boela li kopana hape lekhetho la bobeli, e tliil'o ba papali e matla haholo, kaha mokhahlelong oa pele Lioli e ne e hlole Matlama ka 2-1. Matlama e behile Lioli merebele ha bohloko boemong ba bobeli ka ho bokella lintlha-kholo tse 32. Ha ho le joalo, Matlama e tliil'o lakatsa ho busetsa molamu sefateng, ha Lioli eona e tla ntšetsa pele ho sireletsa seriti sa eona ka ho hapa papali eo.

E tliil'o ba nto a mahlo a mafubelu lipakeng tsa lihlopha tsena tse peli, kaha bobeli li e-na le libapali tse nang le boiphihlelo. 'Mamoratoa Tumelo Khutlang ea seng a hlabile lintlha tse 11 mokhahlelong oa pele oa liki, o tla be a tšepetsoe ho li hlaba lenyele-nyele, 'me a qothisana lehlokoa le Phafa Tšosane ka lehlakoreng la Matlama.

Ho sa le joalo, lipapali tse ling tse tlang ho bapala ka la 20 Pherekhong 2024, ke moo LU eo menyenetsi e ntseng e supa hore e tliil'o matlafatsa sehlopha sa eona ka mohlaba-lintlha ea kotsi e leng Switberth Kum ho hlaha Naheng ea Cam-

eroon, e tlang ho koebana le Liphakoe, Bantu e nkane le LMPS, LCS e momane le CCX ha Machokha e tla botsana lipotso le Lifofane.

Haele ka Sontaha sa la 21 Pherekhong 2024, Manonyane e bonahalang e hula ka boima ho tloha

lipapali tsa Liki e Kholo li qalile ngoahola, e tla bapala le Linare. Naughtyboys e tsietsing e kholo ea ho tla rathoa ka selepe ha selemo sena sa lipapali se fela, e tla isana holimo le tlaase le Lijabatho. Athe Ace Maseru e tla bapala le LDF. Sehlopha seo ho qaliloeng ka sona ke sona se amohelang baeti.

